

aut Athon aut Rhodopen maestae nemora ardua Pisae  
 665 aemulus et miseros ipse ureret Elidis agros.  
 hac pelago libat latices et talibus inquit:  
 'di quibus undarum tempestatisque sonorae  
 imperium et magno penitus par regia caelo,  
 tuque, fretum divosque pater sortite biformes,  
 670 seu casus nox ista fuit seu, volvitur axis  
 ut superum, sic stare operam tollique vicissim  
 pontus habet, seu te subitae nova puppis imago  
 armorumque hominumque truces consurgere in iras  
 impulit, haec luerim satis et tua numina, rector,  
 675 iam fuerint meliora mihi. da reddere terris  
 has animas patriaeque amplecti limina portae.  
 tum quocumque loco meritas tibi plurimus aras  
 pascit honos, ubicumque rotis horrendus equisque  
 stas, pater, atque ingens utrimque fluentia Triton  
 680 frena tenet, tantus nostras condere per urbes.'  
 dixerat haec. oritur clamor dextraeque sequentum  
 verba ducis. sic cum stabulis et messibus ingens  
 ira deum et Calabri populator Sirius arvi  
 incubuit, coit agrestum manus anxia priscum  
 685 in nemus et miseris dictat pia vota sacerdos.  
 ecce autem molli Zephyros descendere lapsu  
 aspiciunt; volat immissis cava pinus habenis  
 infunditque salum et spumas vomit aere tridenti;  
 Tiphys agit tacitique sedent ad iussa ministri:  
 690 qualiter ad summi solium Iovis omnia circum  
 prona parata deo, ventique imbresque nivesque  
 fulguraque et tonitrus et adhuc in fontibus amnes.  
 At subitus curaque ducem metus acrior omni  
 mensque mali praesaga quatit, quod regis adortus  
 695 progeniem raptoque dolis crudelis Acasto  
 cetera nuda neci medioque in crimine patrem